



2026/1363

15.6.2026

CINNEADH (CBES) 2026/1363 ÓN gCOMHAIRLE

an 15 Meitheamh 2026

Iena leasaítear Cinneadh (CBES) 2024/1484 a bhaineann le bearta sriantacha i bhfianaise na staide sa Rúis

TÁ COMHAIRLE AN AONTAIS EORPAIGH,

Ag féachaint don Chonradh ar an Aontas Eorpach, agus go háirithe Airteagal 29 de,

Ag féachaint don togra ó Ardionadaí an Aontais do Ghnóthaí Eachtracha agus don Bheartas Slándála,

De bharr an mhéid seo a leanas:

- (1) An 27 Bealtaine 2024, ghlac an Chomhairle Cinneadh (CBES) 2024/1484 ⁽¹⁾.
- (2) An 14 Feabhra 2026, d'fhoilsigh an Ríocht Aontaithe, an tSualainn, an Fhrainc, an Ghearmáin agus an Ísiltír ráiteas comhpháirteach inar dhearbhaigh siad go bhfuil siad muiníneach gur nimhíodh Alexei Navalny le tocsain mharfach ar a dtugtar eipeabaitidín, in ainneoin gur mhaígh Cónaidhm na Rúise go bhfuair sé bás ar chúiseanna nádúrtha. Is tocsain é eipeabaitidín a fhaightear i bhfroganna i Meiriceá Theas agus níl sé le fáil ó nádúr sa Rúis.
- (3) Dearbhaíonn an tAontas an athuair go gcáineann sé go géar na sárúithe ar chearta an duine agus an cos ar bolg sa Rúis.
- (4) I bhfianaise a thromchúisí atá an staid, measann an Chomhairle gur cheart eintiteas amháin agus 15 dhuine nádúrtha a raibh baint acu le géarleanúint, nimhiú agus bás Alexei Navalny a chur le liosta na ndaoine nádúrtha agus dlítheanacha, na n-eintiteas agus na gcomhlachtaí a leagtar amach san Iarscríbhinn a ghabhann le Cinneadh (CBES) 2024/1484.
- (5) Ba cheart, dá bhrí sin, Cinneadh (CBES) 2024/1484 a leasú dá réir sin,

TAR ÉIS AN CINNEADH SEO A GHLACADH:

Airteagal 1

Leasaítear an Iarscríbhinn a ghabhann le Cinneadh (CBES) 2024/1484 i gcomhréir leis an Iarscríbhinn a ghabhann leis an gCinneadh seo.

⁽¹⁾ Cinneadh (CBES) 2024/1484 ón gComhairle an 27 Bealtaine 2024 a bhaineann le bearta sriantacha i bhfianaise na staide sa Rúis (IO L, 2024/1484, 27.5.2024, ELI: <http://data.europa.eu/eli/dec/2024/1484/oj>).

Airteagal 2

Tiocfaidh an Cinneadh seo i bhfeidhm ar dháta a fhoilsithe in *Iris Oifigiúil an Aontais Eorpaigh*.

Arna dhéanamh i Lucsamburg, an 15 Meitheamh 2026.

Thar ceann na Comhairle

An tUachtarán

K. KALLAS

IARSCRÍBHINN

Leasaítear an Iarscríbhinn a ghabhann le Cinneadh (CBES) 2024/1484 mar a leanas:

(1) cuirtear na hiontrálacha seo a leanas leis faoin gceannteideal 'A. Daoine nádúrtha':

	Ainm	Faisnéis aitheantais	Ráiteas ar chúiseanna	Dáta an liostaithe
73.	Vasily Anatolevich KALASHNIKOV (Rúisis: Василий Анатольевич КАЛАНИКОВ)	Post: Oibrí in Forensic Science Institute of the Federal Security Service of the Russian Federation (FSB) Special Equipment Center (Institiúid na hEolaíochta Fóiréinsí i Lárionad Trealaimh Speisialta Sheirbhís Slándála Cónaidhme Chónaidhm na Rúise (FSB)) Dáta breithe: 11.1.1975 Náisiúntacht: Rúiseach Inscne: fireann	Oibrí in Institiúid na hEolaíochta Fóiréinsí i Lárionad Trealaimh Speisialta Sheirbhís Slándála Cónaidhme Chónaidhm na Rúise (FSB) agus saineolaí ar an gcrómatagrafaíocht gháis-mais-speictriméadracht atá in Vasily Kalashnikov, a bhí ina phearsa rithábhachtach san iarracht a rinne foireann FSB an fhianaise fhóiréinseach uile i leith nimhiú Alexei Navalny a scriosadh. A bhfuí le saineolas teicniúil Vasily Kalashnikov, bhíothas in ann a áirithiú nár fhan aon rian ceimiceach inbhraite ar ghiuirléidí Navalny. Dá bhrí sin, tá Vasily Kalashnikov freagrach as tacaíocht theicniúil agus ábhartha a thabhairt chun an freasúra daonlathach a chur faoi chois trí chúnadh a thabhairt do na gníomhartha sin agus iad a éascú.	15.6.2026
74.	Mikhail Mikhailovich SHVETS (Rúisis: Михаил Михайлович ШВЕЦ) ar a dtugtar freisin Mikhail STEPANOV (Rúisis: Михаил СТЕПАНОВ)	Post: Oibrí in Federal Security Service of the Russian Federation (FSB) Special Operations Center (Lárionad Oibríochtaí Speisialta Sheirbhís Slándála Cónaidhme Chónaidhm na Rúise (FSB)) Dáta breithe: 3.5.1977 (15.4.1974 i gcás an ailias Mikhail Stepanov) Áit bhreithe: Poblacht Shóivéadach Shóisialach na Rúise (Cónaidhm na Rúise anois) Náisiúntacht: Rúiseach Inscne: fireann	Is oibrí ardchéime é Mikhail Shvets i Lárionad Oibríochtaí Speisialta Sheirbhís Slándála Cónaidhme Chónaidhm na Rúise (FSB). Sna himscrúduithe ar nimhiú Alexei Navalny, sainaitnítear Mikhail Shvets mar chomhalta lárnach den “fhoireann nimhithe” líomhnaithe, agus déantar cur síos ar an úsáid a bhain sé as an ailias “Mikhail Stepanov” chun imscaradh ceilte néaroibreáin a éascú. Chuidigh Mikhail Shvets leis an iarracht feallmharaithe trí thacaíocht lóistíochta agus faireachais a sholáthar. Dá bhrí sin, tá Mikhail Shvets freagrach as tacaíocht ábhartha a thabhairt chun an freasúra daonlathach a chur faoi chois trí chúnadh a thabhairt do na gníomhartha sin agus iad a éascú.	15.6.2026

	Ainm	Faisnéis aitheantais	Ráiteas ar chúiseanna	Dáta an liostaithe
75.	Alexei Leonidovich KRIVOSHCHEKOV (Rúisis: Алексей Леонидович КРИВОЩЕКОВ)	Post: Oifigeach sa Service for the Protection of the Constitutional Order and Countering Terrorism of the Federal Security Service of the Russian Federation (FSB) (an tSeirbhís um an Ord Bunreachtúil a Chosaint agus um Sceimhlitheoireacht a Chomhrac de chuid Sheirbhís Slándála Cónaidhme Chónaidhm na Rúise (FSB)) Dáta breithe: 11.4.1979 Náisiúntacht: Rúiseach Inscne: fireann	Is oifigeach den tSeirbhís um an Ord Bunreachtúil a Chosaint agus um Sceimhlitheoireacht a Chomhrac de chuid Sheirbhís Slándála Cónaidhme Chónaidhm na Rúise (FSB) é Alexei Krivoshchekov ó 2008 i leith. Sa phost sin, bhí sé ina bhall de ghrúpa oifigeach FSB a bhí ag feidhmiú faoi chéannacht bhréagach chun faireachas leanúnach a dhéanamh ar Alexei Navalny i gcaitheamh roinnt turas laistigh den Rúis, ó 2017 go 2019. Bhí Alexei Krivoshchekov agus beirt oifigeach eile ag déanamh faireachán ar Alexei Navalny le linn an chéad iarrachta nimhithe go luath in 2017, tráth a bhí sé ag taisteal go Kirov. Dá bhrí sin, tá Alexei Krivoshchekov freagrachas tacaíocht theicniúil agus ábhartha a chur ar fáil chun an freasúra daonlathach a chur faoi chois trí chúnadh a thabhairt do na gníomhartha sin agus iad a éascú.	15.6.2026
76.	Valery Nikolaevich SUKHAREV (Rúisis: Валерий Николаевич СУХАРЕВ) ar a dtugtar freisin Nikolai Aleksandrovich GOROKHOV (Rúisis: Николай Александрович ГОРОХОВ)	Post: Oifigeach Sinsearach in Service for the Protection of the Constitutional Order and Countering Terrorism of the Federal Security Service of the Russian Federation (FSB) (an tSeirbhís um an Ord Bunreachtúil a Chosaint agus um Sceimhlitheoireacht a Chomhrac de chuid Sheirbhís Slándála Cónaidhme Chónaidhm na Rúise (FSB)) Dáta breithe: 2.4.1956 Náisiúntacht: Rúiseach Inscne: fireann	Is oifigeach sinsearach é Valery Sukharev sa tSeirbhís um an Ord Bunreachtúil a Chosaint agus Sceimhlitheoireacht a Chomhrac de chuid Sheirbhís Slándála Cónaidhme Chónaidhm na Rúise (FSB). Sa phost sin, bhí sé ina bhall de ghrúpa oifigeach FSB a bhí ag feidhmiú faoi chéannacht bhréagach chun faireachas leanúnach a dhéanamh ar Alexei Navalny i gcaitheamh roinnt turas laistigh den Rúis, ó 2017 go 2019. Bhí Valery Sukharev agus beirt oifigeach eile ag déanamh faireachán ar Alexei Navalny le linn an chéad iarrachta nimhithe go luath in 2017, tráth a bhí sé ag taisteal go Kirov. Dá bhrí sin, tá Valery Sukharev freagrach as tacaíocht theicniúil agus ábhartha a thabhairt chun an freasúra daonlathach a chur faoi chois trí chúnadh a thabhairt do na gníomhartha sin agus iad a éascú.	15.6.2026

	Ainm	Faisnéis aitheantais	Ráiteas ar chúiseanna	Dáta an liostaithe
77.	Oleg Borisovich TAYAKIN (Rúisis: Олег Борисович ТЯКИН) ar a dtugtar freisin Oleg TARASOV (Rúisis: Олег ТАРАСОВ)	Post: Oifigeach in Institiúid Eolaíochta Fóiréinsí Sheirbhís Slándála Cónaidhme Chónaidhm na Rúise (FSB) (Federal Security Service of the Russian Federation (FSB)) Dáta breithe: 6.12.1980 (6.6.1980 i gcás an ailias Oleg Tarasov) Áit bhreithe: Poblacht Shóivéadach Shóisialach na Rúise (Cónaidhm na Rúise anois) Náisiúntacht: Rúiseach Inscne: fireann	Is oifigeach é Oleg Tayakin in Institiúid Eolaíochta Fóiréinsí Sheirbhís Slándála Cónaidhme Chónaidhm na Rúise (FSB) a raibh ról lárnach aige sna hoibríochtaí faireachais agus cumarsáide a bhain le nimhiú ceimiceach Alexei Navalny. De réir na dtorthaí maidir leis an nimhiú sin, ba é Oleg Tayakin an príomh-chomhordaitheoir don mhisean, ba eisean a bhainistigh an chumarsáid agus an tacaíocht lóistíochta ó ionad ceannais de chuid FSB atá lonnaithe i Moscó. Dá bhrí sin, tá Oleg Tayakin freagrach as tacaíocht theicniúil agus ábhartha a thabhairt chun an freasúra daonlathach a chur faoi chois trí chúnadh a thabhairt do na gníomhartha sin agus iad a éascú.	15.6.2026
78.	Alexander Grigorievich MURAKHOVSKY (Rúisis: Александр Григорьевич МУРАХОВСКИЙ)	Post: Iar-Phríomh-Dhochtúir in Omsk Emergency Hospital No.1; Ceann ar ospidéal míleata in Omsk faoi láthair Dáta breithe: 1.7.1971 Áit bhreithe: Omsk, Poblacht Shóivéadach Shóisialach na Rúise (Cónaidhm na Rúise anois) Náisiúntacht: Rúiseach Inscne: fireann	Is é Alexander Murakhovsky an tIar-Phríomh-Dhochtúir in Omsk Emergency Hospital No.1. Sa phost sin, shéan sé gur nimhíodh Alexei Navalny, dúirt gur “neamhoird mheitibileacha” ba chúis le tinneas Alexei Navalny agus dhiúltaigh sé é a aistriú chuig an nGearmáin lena chóireáil. Ina dhiaidh sin, deimhníodh in anailísí a rinneadh sa Ghearmáin gurbh amhlaidh a nimhíodh Alexei Navalny le substaint ón ngrúpa Novichok. Tá Alexander Murakhovsky ina Cheann ar ospidéal míleata in Omsk faoi láthair. Dá bhrí sin, tá Alexander Murakhovsky freagrach as tacaíocht theicniúil agus ábhartha a thabhairt chun an freasúra daonlathach a chur faoi chois trí chúnadh a thabhairt do na gníomhartha sin agus iad a éascú.	15.6.2026

	Ainm	Faisnéis aitheantais	Ráiteas ar chúiseanna	Dáta an liostaithe
79.	Aleksandr Vladimirovich SABAEV (Rúisis: Александр Владимирович САБАЕВ)	Post: Príomh-Thocsaineolaí agus Ceann Roinn an Ghéarnimhithe in Omsk Emergency Hospital No.1 Náisiúntacht: Rúiseach Inscne: fireann	Is é Aleksandr Sabaev an Príomh-Thocsaineolaí san ospidéal inar cuireadh cóireáil leighis ar Alexei Navalny, sular aslonnaíodh é go dtí an Ghearmáin tar éis na hiarrachta ar é a fheallmharú trí nimhiú. Rinne Aleksandr Sabaev beag is fiú arís agus arís eile de nimhiú Alexei Navalny, dúirt sé gur neamhord meitibileach ba chúis lena dhrochshláinte agus dhiúltaigh sé faisnéis faoi riocht Alexei Navalny a scaoileadh le comhghleacaithe Alexei Navalny. Dá bhrí sin, tá Aleksandr Sabaev freagrach as tacaíocht theicniúil agus ábhartha a thabhairt chun an freasúra daonlathach a chur faoi chois trí chúnadh a thabhairt do na gníomhartha sin agus iad a éascú.	15.6.2026
80.	Anatolii Vyacheslavovich RAZINKIN (Rúisis: Анатолий Вячеславович РАЗИНКИН)	Post: An Chéad Leas-Phríomh-Ionchúisitheoir de chuid Chónaidhm na Rúise Dáta breithe: 24.1.1977 Áit bhreithe: Samara Region, Poblacht Shóivéadach Shóisialach na Rúise (Cónaidhm na Rúise anois) Náisiúntacht: Rúiseach Inscne: fireann	Is é Anatolii Razinkin an Chéad Leas-Phríomh-Ionchúisitheoir de chuid Chónaidhm na Rúise. Sa phost sin, d'fhormheas sé díotáil Alexei Navalny i gcás coiriúil ar chúisimh maidir le calaois agus díspeagadh cúirte. I mí an Mhárta 2022, fuair an chúirt Alexei Navalny ciontach i gcalaois agus i ndíspreagadh cúirte agus ghearr sí téarma príosúnachta 9 mbliana air i gcoilíneacht phionósach, agus na pianbhreitheanna uile á gcur san áireamh. Dá bhrí sin, tá Anatolii Razinkin freagrach as sárúithe tromchúiseacha ar chearta an duine, lena n-áirítear an tsaoirse tuairimíochta agus an tsaoirse chun tuairimí a nochtadh a shárú, agus as gníomhaíochtaí lena mbaintear an bonn go tromchúiseach den smacht reachta sa Rúis.	15.6.2026

	Ainm	Faisnéis aitheantais	Ráiteas ar chúiseanna	Dáta an liostaithe
81.	<p>Alexei Anatolievich ALEKSANDROV</p> <p>(Rúisis: Алексей Анатольевич АЛЕКСАНДРОВ)</p>	<p>Post: Maorghinearál Dlí agus Cirt agus Ceannt Roinn Imscrúdaithe Idir-Réigiúnach Iompair Oirthearach Choiste Fiosrúcháin Chónaidhm na Rúise; iarCheann Roinn Imscrúdaithe Iompair na Sibéire Thiar Choiste Fiosrúcháin Chónaidhm na Rúise.</p> <p>Dáta breithe: 22.12.1975</p> <p>Áit bhreithe: Poblacht Shóivéadach Shóisialach na Rúise (Cónaidhm na Rúise anois)</p> <p>Náisiúntacht: Rúiseach</p> <p>Inscne: fireann</p> <p>INN (Uimhir Aitheantais Cánach Rúiseach): 220408759681</p>	<p>Is Ard-Ghinearál Dlí agus Cirt é Alexei Aleksandrov a bhí ina Cheann ar Roinn Imscrúdaithe Iompair na Sibéire Thiar de Choiste Fiosrúcháin Chónaidhm na Rúise tráth nimhiú Alexei Navalny. Sa cháil sin, dhiúltaigh Alexei Aleksandrov imscrúdú a dhéanamh ar nimhiú Alexei Navalny.</p> <p>In 2022, tugadh ardú céime do Alexei Aleksandrov agus rinneadh Ceann ar Roinn Imscrúdaitheach Idir-Réigiúnach Iompair Oirthearach Choiste Imscrúdaitheach Chónaidhm na Rúise, agus tá sé ag obair sa ról sin ó shin.</p> <p>Dá bhrí sin, tá Alexei Aleksandrov freagrach as sárúithe nó mí-úsáidí tromchúiseacha i réimse chearta an duine agus as an tsochaí shibhialta agus an freasúra daonlathach a chur faoi chois.</p>	15.6.2026
82.	<p>Natalia Vladimirovna KONOVALOVA</p> <p>(Rúisis: Наталья Владимировна КОНОВАЛОВА)</p>	<p>Post: Breitheamh de Chúirt Chathair Mhoscó</p> <p>Dáta breithe: 15.12.1972</p> <p>Náisiúntacht: Rúiseach</p> <p>Inscne: baineann</p>	<p>Is Breitheamh de Chúirt Chathair Mhoscó í Natalia Konovalova. Sheas sí le cinneadh Chúirt Dúiche Lefortovo, a dhiúltaigh don ghearán i gcoinne Stiúirthóireacht Imscrúdaitheach Sheirbhís Slándála Cónaidhme Chónaidhm na Rúise (FSB) as a neamhghníomhaíocht maidir le nimhiú Alexei Navalny.</p> <p>Ina theannta sin, chuir Natalia Konovalova síneadh roimhe sin le coinneáil bhaill an bhanna ceoil Pussy Riot agus sheas sí le gabháil an iriseora Mheiriceánaigh Evan Gershkovich, an iriseora Rúisigh Ivan Safronov agus an mhic léinn Rúisigh Ibragim Orudzhey.</p> <p>Dá bhrí sin, tá Natalia Konovalova freagrach as sárúithe nó mí-úsáidí tromchúiseacha i réimse chearta an duine agus as an tsochaí shibhialta agus an freasúra daonlathach a chur faoi chois.</p>	15.6.2026

	Ainm	Faisnéis aitheantais	Ráiteas ar chúiseanna	Dáta an liostaithe
83.	Marina Andreeva БОБЕК (Rúisis: Марина Андреева БОБЕК)	Post: Ionchúisitheoir i Roinn Oifig Phríomh-Ionchúisitheoir Chónaidhm na Rúise Dáta breithe: 12.8.1986 Náisiúntacht: Rúiseach Inscne: baineann	Is Ionchúisitheoir i Roinn Oifig Phríomh-Ionchúisitheoir Chónaidhm na Rúise í Marina Bobek. Sa ról sin, bhí sí freagrach as roinnt cásanna d'ionchúiseamh coiriúil a bhain le saoránaigh de Chónaidhm na Rúise a chuir i gcoinne an réimis pholaitiúil atá ann faoi láthair, lena n-áirítear cásanna a bhaineann le Alexei Navalny. Dá bhrí sin, tá Marina Bobek freagrach as sáruithe nó mí-úsáidí tromchúiseacha i réimse chearta an duine agus as an tsochaí shibhialta agus an freasúra daonlathach a chur faoi chois.	15.6.2026
84.	Ekaterina Petrovna IVANNIKOVA (Rúisis: Екатерина Петровна ИВАННИКОВА)	Post: Ionchúisitheoir i Roinn Achomhairc Roinn Choiriúil agus Bhreithiúnach Oifig an Ionchúisitheora, Moscó Dáta breithe: 6.4.1988 Náisiúntacht: Rúiseach Inscne: baineann	Is Ionchúisitheoir i Roinn Achomhairc Roinn Choiriúil agus Bhreithiúnach Oifig an Ionchúisitheora Chónaidhm na Rúise í Ekaterina Ivannikova. Sa ról sin, bhí sí freagrach as ionchúiseamh coiriúil a bhain le saoránaigh de chuid Chónaidhm na Rúise a chuir i gcoinne an réimis pholaitiúil atá ann faoi láthair. Bhí baint ag Ekaterina Ivannikova leis an tsabaitéireacht a rinneadh ar an imscrúdú ar nimhiú Alexei Navalny. Ina theannta sin, bhí baint ag Ekaterina Ivannikova le cás Serebrennikov trí dhiúltú do Alexei Malobrodsky a aistriú ó choinneáil go braighdeanas baile. Dá bhrí sin, tá Ekaterina Ivannikova freagrach as sáruithe nó mí-úsáidí tromchúiseacha ar chearta an duine, as cos ar bolg a dhéanamh ar an tsochaí shibhialta agus ar an bhfreasúra daonlathach, agus as gníomhaíochtaí lena mbaintear an bonn go tromchúiseach den daonlathas nó den smacht reachta sa Rúis.	15.6.2026

	Ainm	Faisnéis aitheantais	Ráiteas ar chúiseanna	Dáta an liostaithe
85.	Aleksandr Vladimirovich GUTSAN (Rúisis: Александр Владимирович ГУЦАН)	Post: Príomh-Ionchúisitheoir Chónaidhm na Rúise Dáta breithe: 6.7.1960 Áit bhreithe: Siversky settlement, Gatchinsky District, Leningrad Region, Poblacht Shóivéadach Shóisialach na Rúise (Cónaidhm na Rúise anois) Náisiúntacht: Rúiseach Inscne: fireann INN (Uimhir Aitheantais Cánach Rúiseach): 781610240809	Is é Aleksandr Gutsan Príomh-Ionchúisitheoir Chónaidhm na Rúise ó mhí Mheán Fómhair 2025 i leith. Sa ról sin, bhí sé freagrach as an achainí chun eagraíocht Alexei Navalny, an Fhondúireacht in aghaidh an Éillithe (ACF) a dhearbhu mar eagraíocht sceimhlitheoireachta, agus ar an gcaoi sin aon chomhlachas le ACF a choiriú. Mar thoradh ar an gcoiriú sin, gabhadh líon mór daoine ó lucht tacaíochta ACF ar chúisimh maidir le “maoiniú sceimhlitheoireachta”. Dá bhrí sin, tá Aleksandr Gutsan freagrach as sáruithe nó mí-úsáidí tromchúiseacha ar chearta an duine, as cos ar bolg a dhéanamh ar an tsochaí shibhialta agus ar an bhfreasúra daonlathach, as gníomhaíochtaí lena mbaintear an bonn go tromchúiseach den daonlathas agus den smacht reachta sa Rúis.	15.6.2026
86.	Oleg Nikolaevich NEFEDOV (Rúisis: Олег Николаевич НЕФЕДОВ)	Post: Breitheamh de Chúirt Uachtarach Chónaidhm na Rúise; Cathaoirleach ar an gComhdhéanamh Breithiúnach Céadchéime den Choláiste Breithiúnach um Chásanna Riaracháin i gCúirt Uachtarach Chónaidhm na Rúise Dáta breithe: 1.8.1974 Áit bhreithe: Kuznetsk, Poblacht Shóivéadach Shóisialach na Rúise (Cónaidhm na Rúise anois) Náisiúntacht: Rúiseach Inscne: fireann SNILS: 07750947803	Tá Oleg Nefedov ina Bhreitheamh de Chúirt Uachtarach Chónaidhm na Rúise ó bhí 2017 ann agus tá sé ina Chathaoirleach ar an gComhdhéanamh Breithiúnach Céadchéime den Choláiste Breithiúnach um Chásanna Riaracháin i gCúirt Uachtarach Chónaidhm na Rúise ó bhí 2023 ann. Ina ról mar Bhreitheamh den Chúirt Uachtarach, bhí Oleg Nefedov i gceannas ar roinnt rialuithe a chuir srian ar an tsaoirse eagrúcháin, ar an bhfreasúra polaitiúil agus ar chearta an duine, lena n-áirítear eagraíocht Alexei Navalny, an Fhondúireacht Frith-Éillithe, a ainmniú mar eagraíocht sceimhlitheoireachta. Rialaigh Oleg Nefedov cosc a chur ar an “gluaiseacht idirnáisiúnta LADT”. Dá bhrí sin, tá Oleg Nefedov freagrach as sáruithe nó mí-úsáidí tromchúiseacha ar chearta an duine, as cos ar bolg a dhéanamh ar an tsochaí shibhialta agus ar an bhfreasúra daonlathach, as gníomhaíochtaí lena mbaintear an bonn go tromchúiseach den daonlathas agus den smacht reachta sa Rúis.	15.6.2026

	Ainm	Faisnéis aitheantais	Ráiteas ar chúiseanna	Dáta an liostaithe
87.	Roman Yurievich PLUGIN (Rúisis: Роман Юрьевич ПЛУГИН)	Post: Leifteanant-Ghinearál na bPóilíní; Coimisinéir Phóilíní Chathair Pheadair; Ceann Phríomh-Stiúrthóireacht na hAireachta Gnóthaí Baile do Chathair Pheadair agus do Réigiún Leningrad Dáta breithe: 10.3.1975 Áit bhreithe: Stavropol, Poblacht Shóivéadach Shóisialach na Rúise (Cónaidhm na Rúise anois) Náisiúntacht: Rúiseach Inscne: fireann Uimhir aitheantais chánach: 502719429607 SNILS: 10906646049	Is é Roman Plugin Ceann Phríomh-Stiúrthóireacht na hAireachta Gnóthaí Baile do Chathair Pheadair agus do Réigiún Leningrad, ar a dtugtar Póilíní Chathair Pheadair freisin. Sa ról sin, tá sé freagrach as an tsaoirse cainte a theorannú trí ordú a thabhairt go ndéanfaí lucht caointe Alexei Navalny a ghabháil agus a choinneáil ar chothrom lae a bháis, agus go ndéanfaí ceoltóirí sráide síochánta a ghabháil i gCathair Pheadair a chan amhráin a measadh gur léirigh siad tacaíocht don fhreasúra. Dá bhrí sin, tá Roman Plugin freagrach as sárúithe nó mí-úsáidí tromchúiseacha ar chearta an duine agus as gníomhaíochtaí lena mbaintear an bonn den daonlathas nó den smacht reachta sa Rúis.	15.6.2026;

(2) cuirtear an iontráil seo a leanas leis faoin gceannteideal ‘B. Daoine dlítheanacha, eintitis agus comhlachtaí’:

	Ainm	Faisnéis aitheantais	Ráiteas ar chúiseanna	Dáta an liostaithe
‘2.	<p>IPJSC NTK</p> <p>ar a dtugtar freisin International Public Joint-Stock Company NTK</p> <p>ar a dtugtar freisin NTH International Joint Stock Company</p> <p>(Rúisis: MKAO NTKh, MKAO HTX, MKAO NTH, MKAO NTKh)</p>	<p>Seoladh: 236004, Kaliningrad region, Kaliningrad, Okyabrskaya street 71-73, room 25</p> <p>Ríomhphost: info@ntechlab.ru</p> <p>Suíomh gréasáin Rúiseach: www.ntechlab.ru</p> <p>Suíomh gréasáin idirnáisiúnta: www.ntechlab.com</p> <p>INN: 3900040153</p> <p>KPP: 390001001</p> <p>OGRN: 1253900004412</p> <p>OKPO: 87427827</p>	<p>Is é IPJSC NTK cuideachta sealbhaíochta NtechLab. Is cuideachta teicneolaíocht aghaidh-aitheanta Rúiseach é NtechLab, atá faoi réir smachtbhannaí an Aontais. Chomhoibrigh sé le Roinn Teicneolaíochtaí Faisnéise Chathair Mhoscó maidir le forbairt an chórais aghaidh-aitheanta i Moscó.</p> <p>Bhain Príomh-Stiúrthóireacht Gnóthaí Inmheánacha Chathair Mhoscó úsáid as an gcóras aghaidh-aitheanta i Moscó mar uirlis cos ar bolg chun faireachán a dhéanamh ar iriseoirí neamhspleácha, ar ghníomhaithe freasúra agus ar rannpháirtithe in agóidí síochánta a thacaigh le Alexei Navalny agus a bhí i gcoinne ionradh na Rúise ar an Úcráin, agus chun iad a choinneáil. Bunaíodh IPJSC NTK chun oibríochtaí NtechLab a ghlacadh ar lámh nuair a d’aistrigh an cuideachta go dtí an Rúis.</p> <p>Dá bhrí sin, tá IPJSC NTK freagrach as tacaíocht theicniúil nó ábhartha a thabhairt chun sáruithe tromchúiseacha a dhéanamh ar chearta an duine sa Rúis, lena n-áirítear gabhálacha nó coinneáil threallach, agus as sáruithe nó mí-úsáid na saoirse comhthionóil síochánta agus na saoirse comhlachais.</p>	15.6.2026’.